

14 NOV 1998

Mahathir-politik

KEBEBASAN NEGARA AKAN HILANG AKIBAT DEDAH MASALAH SENDIRI

KUALA LUMPUR, 14 Nov (Bernama) -- Perdana Menteri Datuk Seri Dr Mahathir Mohamad khuatir Malaysia akan kehilangan kemerdekaannya jika segelintir rakyat terus mendedahkan masalah dalaman negara kepada orang luar dan mempelawa campurtangan mereka.

Katanya jika perbuatan ini berterusan, orang asing akan menentukan siapa yang akan menjadi pemimpin negara dan siapa yang harus diberi keutamaan.

Beliau berkata demikian dalam temubual eksklusif dengan Bernama TV apabila diminta membuat perbandingan di antara krisis politik yang dialaminya pada 1987 dan masalah politik yang dihadapi sekarang.

Pada 1987 Dr Mahathir hampir tewas dalam pemilihan presiden Umno manakala hampir separuh daripada anggota Kabinet meninggalkan parti dan Umno sendiri kemudiannya diharamkan.

Kini politik negara bergolak semula ekoran pemecatan bekas Timbalan Perdana Menteri Datuk Seri Anwar Ibrahim pada ketika negara masih dilanda kegawatan ekonomi.

Menyorot peristiwa 1987, Dr Mahathir berkata: "Waktu itu kita berasa ianya amat teruk sekali kerana kemungkinan parti pecah dua memangpun ada.

"Sebenarnya parti telah pecah. Walaupun saya dapat menarik balik majoriti, tetapi akibatnya ialah hampir separuh daripada parti telahpun hilang untuk menyertai parti S46.

"Kali ini, selain daripada beberapa puluh orang yang tidak ada jawatan yang penting dalam parti, yang lain memberi sokongan penuh.

"Semua menteri-menteri besar, semua menteri-menteri kabinet, timbalan menteri, semuanya memberi sokongan penuh dan mereka sebenarnya membuat keputusan ini untuk tindakan yang kita ambil."

Ditanya bagaimana beliau berhadapan masalah politik yang berlaku ditambah pula kegawatan ekonomi, Dr Mahathir berkata beliau masih boleh menguruskannya.

"Saya rasa dengan bantuan rakan-rakan saya ... dan semuanya memberi sokongan kuat ... semua anggota kabinet, semua anggota parti memberi sokongan kuat. Saya tahu saya boleh bergantung harap dengan mereka dan ia akan menambah keupayaan saya bekerja."

Diajukan bahawa masalah yang dihadapi kini tidaklah sehebat yang pernah beliau alami, Dr Mahathir beliau tidak menafikan yang masalah kini juga hebat.

"Tinggal lagi, yalah, orang asing sudah mula campur tangan kerana pihak berkenaan (penyokong Anwar) mendapat sokongan daripada orang asing yang tidak tahu apa sebenarnya yang berlaku.

"Sementara dahulu 1987, orang asing tidak campur tangan. Ini seolah-olah kita negara tak bebas, bukan negara merdeka.

"Masalah dalam rumah kita pun nak didedah kepada orang asing.

"Saya khuatir kalau kita mula buat demikian, maka kebebasan kita akan hilang.

"Orang lain akan menentukan siapa yang akan menjadi pemimpin, siapa yang harus diutamakan dan sebagainya."

Ditanya mengenai hasrat pihak tertentu untuk melihat pergolakan yang berlaku di negara-negara jiran turut berlaku di Malaysia, Dr Mahathir berkata harapan mereka sebenarnya adalah supaya diadakan rusuhan secara besar-besaran di seluruh negara.

"Dengan itu, kerajaan ini tumbang dan apabila kerajaan ini tumbang,

maka perbincangan tidak akan diadakan. Jika tidak ada perbincangan, maka perkara-perkara sensitif tidak akan didedah.

"Jadi, apabila kita tidak tumbang dan perbincangan diadakan, saya yakin hasrat mereka tidak tercapai."

Mengenai kemungkinan pihak-pihak tertentu akan mengambil kesempatan pada Sidang Apec ini untuk menonjolkan Malaysia sebagai negara tidak demokratik, Perdana Menteri berkata pemerhati dari luar, jika mereka betul-betul meneliti, akan mendapati bahawa kerajaan yang ada sekarang ini adalah kerajaan yang dipilih oleh rakyat melalui pilihan raya yang diiktiraf sebagai sah.

Sebaliknya cara untuk menjatuhkan kerajaan ini bukan dengan cara penentuan oleh rakyat tetapi dengan cara kekerasan.

Misalnya, dengan cuba melawan dengan polis, cuba bakar tempat itu dan tempat ini dan cuba mencabuli masjid.

"Ini tidak demokratik. Kalau mereka benar-benar demokratik, mereka tidak akan buat perkara ini," kata Perdana Menteri.

"Mereka dari negara asing yang kononnya begitu sekali memandang pentingnya ada demokrasi, mereka tentu tahu bahawa cara untuk menjatuhkan kerajaan ini bukan cara demokratik.

"Sebaliknya, kerajaan ini ditubuh melalui proses demokrasi.

Ditanya mengapa Malaysia kebelakangan ini mendapat publisiti amat buruk sekali daripada media asing, Dr Mahathir berkata ini mungkin kerana Malaysia terlalu lantang bersuara.

"Kita suka berterus-terang. Mereka tidak biasa dikritik tetapi biasa mengkritik orang lain. Jadi, apabila mereka menerima teguran yang serupa, mereka tidak dapat menerimanya, terutama seperti apa yang disuarakan dalam media.

"Jadi, mereka bersungguh-sungguh melakukannya kerana kita secara terbuka berpendapat bahawa media mereka salah. Dan sistem mereka adalah salah dan regim kewangan mereka juga salah.

"Mereka tidak suka diberitahu bahawa mereka salah. Mereka suka memberitahu orang lain bahawa orang lain yang salah. Contohnya, mereka menyalahkan kerajaan kita di atas apa yang berlaku.

"Tetapi kita menyalahkan mereka dan mereka tidak suka mendengarnya. Jadi, kita bukanlah orang kesayangan (darling) mereka."

Beliau bersetuju bahawa media antarabangsa tidak bersikap adil kepada Malaysia. -- Bernama

sj